

ABENDUALDIKO III. IGANDEA (A)

Otoitza

Jainko Jauna, ikusten duzu zeure herria,
zeure Semearen jaioteguna zintzoki itxaroten;
iguzu, arren,
Eguberritako salbamen miragarriaren zorionera irits gaitzela
eta pozik haundienaz ospa dezagula.
Zure Seme Jesu Kristo.

I. IRAKURGAIA: Is 35, 1-6a. 10

*Jainkoa bera etorriko da,
eta salbatuko gaitu.*

Isaias Profetaren liburutik

Honela mintzo da Jauna:
Poztuko dira basamortua eta lur agorra,
alaituko basa lurrak, eta lilia bezala loratuko,
loratuko eta poztuko dira irrintziz jauzika.
Libano bezain zoragarri
eta Karmel eta Sarion bezain eder bihurtuko dira,
ikusiko dute Jaunaren aintza,
gure Jainkoaren edertasuna.
Indar itzazue esku ahulduak,
sendotu belaun kolokak;
esan bihotz-beldurtiei:
«Gora bihotzak! Ez izan beldurrik!
Badator Jaungoikoaren mendekua,
Jaungoikoaren saria.
Bera etorriko da, eta salbatuko zaituzte».
Orduan itsuen begiak irekiko dira,
eta gorren belarriak zabalduko.
Orduan herrenak basauntzak bezala jauzi egingo du,

eta mutuaren mihiak oihu egingo pozez.
 Jaunak salbatuak itzuliko dira handik,
 Siona itzuliko dira pozez kantari:
 Aurretik, betiereko poza;
 atzetik, poza eta alaitasuna.
 Kezka eta negarrek ihes egingo dute.

ERANTZUN SALMOA: Sal 145, 6c-7ab. 7c-8. 9-10

R/. **Zatoz, Jauna, eta salba gaitzazu,**

Edota: **Aleluia.**

Leiala da betiren beti,
 ematen die eskubidea zapaldui,
 ogia, gose direnei. R/.

Atxilotuak Jaunak askatzen ditu,
 itsuen begiak Jaunak argitzen ditu.
 Konkor daudenak Jaunak ditu zutierazten,
 zintzoak Jaunak ditu maitatzen. R/.

Arrotzak Jaunak ditu zaintzen,
 umezurtz eta alargunak laguntzen,
 gaiztoen asmoak eragozten.
 Errege izango da Jauna sekuletan,
 zure Jainkoa, Sion, menderen mendetan. R/.

II. IRAKURGAIA: St 5, 7-10

Egon sendo, Jaunaren etorrera hurbil da eta.

Santiago Apostoluaren epistolatik

Senideok: Izan ezazue iraupen Jaunaren etorrera arte. Begira nola egoten den nekazaria, lurrak dakarren uzta ederraren zain, goizeuria eta beranteuria itxaroten dituela iraupenez. Izan ezazue, beraz, zuek ere iraupen; egon sendo, Jaunaren etorrera hurbil da eta.

Senideok, ez izan elkarrentzat esparik eta kexarik, epaitu ez zaitzaten. Begira, epailea ate ondoan dago. Senideok, neke eta eramanpenetan, har itzazue ikasbide, Jaunaren izenean hitzegin zuten Profetak.

EBANJELIOA: Mt 11, 2-11

Aleluia: Ikus Lk 4, 18

R/. Aleluia.

V/. Jaunaren Espiritua niregan dago,
behartsuei berri ona ematera bidali nau. R/.

*Zu al zara etortzekoa,
ala besteren baten zain egon behar dugu?*

Jesu Kristoren Ebanjelioa San Mateoren liburutik

Aldi hartan, Joanek gartzelan Kristoren egiteak entzunik, bere bi ikasle bidali zizkion galdetzeraz: «Zu al zara etortzekoa, ala besteren baten zain egon behar dugu?»

Jesusek erantzun zien: «Zoazte eta esan Joani entzuten eta ikusten duzuenaz: itsuek ikusten dute, eta elbarriak badabiltza; legenardunak garbi gelditzen dira, eta gorrek entzuten dute; hildakoak bizten dira, eta behartsuei berri ona hotsegiten zaie. Eta zorionekoa, Niregandik erorbide hartzen ez duena!»

Haiek aldegitean, Jesus Joanez mintzatzen hasi zitzaion jendeari: «Zer ikustera atera zineten basamortura? Haizeak astintzen duen kainabera bat? Edota zer ikustera atera zineten? Apain jantzitako gizonen bat? Apain jazten direnak, errege jauregietan egoten dira. Zertara atera zineten, bada? Profetaren bat ikustera? Baietz diotsuet; eta profeta baino gehiago den bat. Horrentzat baitago idatzirik:

"Begira, hor bidaltzen dut Nik
nire mezularia zure aurretik,
zuri bidea prestatzera".

Egi-egiaz diotsuet: Ez da sortu amaren semerik inor, Joan Bataiatzailea baino haundiagorik. Hala ere, zeruetako erreinuan txikiena, hura baino haundiago da».

Oparigaien gainekoa

Atsegin bekizkizu, Jauna, gure eskaintzak,
eta bete ezazu guregan, sakramentu honen bidez,
zeure salbamen egintza.
Jesu Kristo.

Prefazioa: Abendualdikoa.

Jaunartze ondorengoa

Jauna, zure errukiari deika gaude:
hartu dugun sakramentu honek
senda gaitzala gure ohitura txarretatik,
eta datozkigun jaietarako presta gaitzala.
Jesu Kristo.